

重修兩淮鹽法志

兩淮鹽法志卷一百二十五

鹽價上

湖廣江防加價

自軍興後京外各餉以兩淮課釐爲大宗光緒二年侍郎袁保恆議加鹽價每斤一文以引計之淮北每引須加入百文淮南須加一千二百文鹽臣以核入成本勢必銷滯運艱其事遂寢至十年楚督因江防吃緊無論川淮每斤加抽錢二文以充礮臺軍械之用江省勢難力爭而其時適有宜昌加抽川釐之舉二者猶得以相持也志江防加價

光緒十年正月署湖廣總督卞寶第湖北巡撫彭祖賢奏  
稱准戶部咨開遵議臣等會奏察看江防形勢應行籌  
辦事宜一摺所請截留湖北應解邊防經費作爲江防  
經費實難議准其見應如何籌辦江防應飭自爲籌計  
不得以款難挪借藉詞諉卸等因臣等查鄂省款項奇  
絀庫藏罄竭有欠無存見時籌辦江防不能不建礮臺  
製槍礮核計用款至少非十餘萬不可查光緒四年湖  
北辦理晉豫賑捐由淮鹽商販按每鹽一引加價銀一  
錢按鹽一斤不過增錢三毫協助賑需已著成效此次  
江防需款實較辦賑爲尤重擬卽援照捐賑成案變通

辦理每鹽一斤加價錢二文在食鹽之家大戶日用鹽一斤半斤不過日多費錢一文二文次小各戶更屬無多以零集整可期成數見與鹽道武震淮鹽督銷局道員程桓生詳細商酌僉稱可行臣爲鄂省目前江防餉需計之舍此亦實別無可籌惟川鹽與淮鹽分銷湖南與湖北接壤凡有湘鄂行銷之鹽無論川淮概須每斤加價錢二文以昭畫一而免民間取巧等弊所收錢數照案由各商販交督銷局彙解善後局備用俟江防撤後卽行停止二月奉

旨戶部知道欽此嗣經部咨查兩湖地方每年約銷淮鹽二

十三萬九千餘引每引鹽六百斤以每斤加價二文計  
算可收錢二十八萬六千餘串又川鹽行楚每年約運  
銷八千四百引花鹽每引一萬斤巴鹽每引八千斤花  
巴二鹽牽算以每斤二文計之約可收錢十五萬串有  
奇總計川淮兩處運楚之鹽每年約可共收錢四十餘  
萬串有奇除辦理江防據奏稱需經費銀十餘萬兩外  
尚有贏餘應令專款存儲報部候撥至此次加價二文  
究於課運民食有無妨礙應查明專案聲覆仍咨湖廣  
總督轉飭各該局員妥爲經理勿使稍有流弊

光緒十年三月鹽政左宗棠覆湖廣總督咨貴省籌辦江

防每斤加價二文查光緒二年袁部堂奏請各省酌加  
鹽價每斤二文經沈前部堂切實覆奏兩淮礙難議增  
在案近來淮鹽售銷已形疲滯食戶與商人唇齒相依  
遽增售價與銷路是否相妨應飭局查議旋據湖北鹽  
法道武震等稟楚省江防緊要加諸食戶淮局未便力  
爭且經奉

旨應卽遵行因於三月初五日起每引正鹽六百斤每斤加  
價二文合小引每引收銀五錢八分呈報在案查袁侍  
郎請統加鹽價經沈前部堂奏覆誠恐官滯私暢礙難  
加增此次楚岸屢飭認真緝私以冀無礙官引且逼近

鄰私邊界提鹽價未議加或不至過於窒礙以前鄂岸  
淮鹽價值初定二十四兩尙有陸課錢文嗣經分別裁  
減爲數甚鉅今以江防加價能否於銷市不甚關礙原  
難豫定目前行販聞風先期趕買已抵一月銷數加價  
後一兩月閒銷市不足爲憑擬察看情形數月之後如  
果售數不甚懸殊則於楚省有裨而於淮綱無損儻銷  
數竟形疲滯再當由憲台咨明楚省奏請停加抑或每  
斤祇加一文統容酌核辦理經鹽政左宗棠批每引增  
收銀五錢八分爲數過重行販趕買未加價之鹽其聞  
風裹足已可概見仰仍體察情形或請全停或予酌減

總視銷市暢滯隨時稟候奏咨不得以有此覆文遽爲  
定案四月督銷局道員程桓生稟銷路是否窒礙須俟  
數月後方知實在江防經費之能否接續照收必視正  
項課釐之有無減損輕重兼權本未敢以覆文遽爲定  
案湖南鹽法道郭從矩等稟湘省一隅上困於粵下困  
於川小民利其價廉味厚百計偷販今每斤加價二文  
照六百斤成引計算每百斤亦需加銀一錢淮價愈增  
誠恐私販愈甚雖川淮一時並加似屬持平之道無如  
川鹽順流而下成本實輕於淮價之高低商人自爲操  
縱非淮鹽官爲定價可比昔年加重鄰稅原爲疏通淮

銷起見川商卽跌價搶銷以利私販轉售是其明驗至  
粵鹽陸路毘連百計繞越巡緝稍爲認真爭鬪之案層  
見疊出釐金局設卡抽收鹽稅亦祇能准其偷越之腳  
費以爲收數卽令一律加價萬難遵照奏定章程辦理  
淮鹽則點滴歸眞鄰鹽則名實不副小民趨利若鶩禁  
令實有所不行此加價後川粵鄰鹽必愈加充斥之實  
在情形也淮引四岸惟湘岸最滯今歲開辦尙係戊寅  
春綱丁丑秋綱尙未銷竣運商旣苦場商因之去夏淮  
南場商稟請運鹽赴借銷川鹽引地減價敵私經議定  
由額內商人自行試辦業經奏咨在案見在螺山減價

敵私之鹽每斤四十六文一江之隔價值懸殊岳州湘陰益陽一帶銷數頓絀未必有益於鄂先已有損於湘今更於見行淮鹽引地加價民間食賤自屬恆情緝鄰鹽防範既苦於計窮緝減價之淮鹽愚民且援爲口實此加價後減價淮鹽勢必侵占正岸之實在情形也鹽政左宗棠批湘岸加價既於課運有礙自未便仿鄂試行致與部文相背應俟三箇月後察看鄂局銷數再行彙奏嗣經卞寶第咨覆鹽銷疲滯總以嚴緝私販爲第一要著但得私販斂迹無慮銷路窒礙曾經咨覆在案誠以淮鹽定有行銷引地原不應任令鄰私侵灌乃督

銷局不妥籌緝私良法而徒藉口於食戶加價二文有礙銷路試問徧地皆私卽不如此二文准鹽可得暢銷否耶應仍遵奏案加收

光緒十年三月署湖廣總督卞寶第咨查武昌省所銷淮鹽去冬曾由賣戶每斤私加價錢四文行至數月並無妨礙見擬加收江防經費加價二文卽於所加四文中畫出二文歸公不准藉詞再加似仍取之食戶與商本無損見通飭各州縣及留防營弁認真緝私儻敢玩縱定卽參辦但得私販斂迹自無慮銷路窒礙經鹽政左宗棠覆咨查應辦江防奏明將鹽斤加價作爲江防經

費亦屬不得已之辦法此案先據督銷局稟已於三月初五日起每引增收銀五錢八分業經批發以爲數過重應再體察情形或請全停或予酌減在案是此後必須銷市一無短絀方可照辦應俟數月後再行定案惟所慮者名雖出自食戶實則取之水販且鄂中每引以錢合銀僅收五錢八分自此以後比前若因之短銷一引則淮南卽短收釐銀六兩有奇是鄂中所得者小而淮南所失者大至貴督咨開鄂銷淮鹽去冬由各商販按每斤私加錢四文是鄂省商販暗索舊章並未據局詳稟無從查考應飭督銷局查明詳報四月督銷局道

員程桓生稟該販私加鹽價四文係指鋪販轉售食戶而言殆鹽價有貴賤鋪戶零買錢數致有增減各屬城鄉銷市俱有不同與局售價銀無涉故未詳稟查考

光緒十年三月湖北督銷局道員程桓生湖北鹽法道武震呈江防加價二月奉署湖廣督院札飭局遵辦並出示曉諭食戶每鹽一斤祇加價二文不准商人藉此影射格外增加至私鹽充斥尤宜認真查緝如有拏獲私販應如何獎賞會議核辦等因當卽遵照舉行一面出示曉諭定於三月初五日起漢局售鹽於售價外飭水販按斤加價二文淮鹽係按引出售每引正鹽六百斤

應收錢一千二百文鹽價係收銀應合成銀數合小引  
每引收銀五錢八分隨正價並收不准鋪戶藉詞影射  
格外加增武穴德安新隄三分局於文到五日一律照  
辦每月由卑局彙齊解交湖北善後局查收濟用其邊  
界提運減價敵私之鹽未便照加至前議監沔賑款按  
引收銀一錢先由卑局墊解銀五千兩約已收一千數  
百兩其餘尙未收集此次每斤加價二文則前項之每  
引一錢若再併收未免過於喫重擬於核收江防經費  
之日卽停止助賑一錢之款總分局將已收之數截清  
實共收銀若干兩另文報明所有五千兩預墊未足之

數未便久懸擬於新收款內畫出歸還以清款目第按斤加價後慮私鹽充斥擬卽會同鹽道衙門籌議章程另行詳請湖廣督憲核奪飭屬實力遵行庶於鹺銷不致窒礙

光緒十年六月湖廣總督卞寶第湖北巡撫彭祖賢奏臣疊接探報法夷違約攻我粵邊防營並調兵船集上海稱欲赴天津索償兵費又雇長江引水多人希圖入江等說法夷反覆無常雖未必啟釁長江遲思狡逞然輪船迅速一水可通要亦不能無備臣前奏查看江防情形聲明田家鎮爲全楚門戶須五千人扼守方足以資

捍禦因地量敵實難過少原設鄂防武毅營前經提督  
李長樂調帶四營赴防天津未令回鄂見存陸路營勇  
爲數無多武漢襄樊伏莽未盡緝捕彈壓均須留防竊  
計臨警之時可以抽調赴敵者總不過二千兵力過  
形單薄今擬先事增營固屬難籌款項然待臨渴掘井  
又恐貽誤事機當與善後局司道籌商暫募湘勇兩營  
先期訓練以備調遣應給支食薪糧未敢動用正款臣  
查江防經費業已奏奉

諭旨准於食鹽賣價每斤加錢二文鄂銷川淮等鹽行已兩  
月有餘民情安之若素核諸課運亦尙如常卽此集零

成整似可稍資協濟惟湘岸鹽價商人不願豫繳至今  
未曾舉行臣當體察輿情亦不勉強但就鄂省見籌經  
費章程與江防相爲終始自不甚於掣肘奉

旨報可

光緒十年六月湖南鹽法道郭從矩等稟准鹽加價一案  
前奉批示湘岸多一粵鹽浸灌岳州等處又與減價之  
螺山祇隔一江與鄂岸情形迥不相同准鹽加價既於  
課運有礙自未便仿鄂試行致與部文相背遵照辦理  
兩月以來於常德湘潭等處遇有私販囤積隨時實力  
堵緝惟疊奉南撫憲面諭粵鹽加價二文已奏准通飭

衡永各局欽遵辦理粵鹽既加淮鹽事同一律但能認真緝私未必卽有窒礙等語查湘岸各分局緝私稍一認真拒捕之案時所不免不能不倚重地方官隨時整頓再四籌商擬每斤加價一文每票照正引扣收錢三百串以錢折銀每票約收銀一百八十兩目前銀價甚昂每石又加價百文銷市未必毫無妨礙但令緝私能不掣肘或於常年銷數不致十分懸殊經鹽政曾國荃批查鄂局加價後銷市尙不致過滯湘局既經楚省大府催辦該道等擬將淮鹽每斤加價一文又據聲明目前銀價甚昂每石又加百文是加收後銷市能否無礙

尙無把握姑准試行兩箇月如果銷數有礙仍卽稟請  
停止八月郭從矩稟奉批見經通飭各分局於見銷之  
票起每實鹽百斤加牌價長平銀五分每票連餘斤約  
可加銀一百八十兩其餘斤多者亦卽全數報斤由卑  
局彙算計有若干另款存儲稟候批示撥用

光緒十年八月湖南督銷局鹽法道郭從矩等稟奉署湖  
廣督憲卞札據湖北督銷淮鹽局稟鄰鹽侵灌通城邊  
銷愈滯懇檄委催銷以固鄂岸藩籬當批據稟通城毘  
連平江義甯鹽價貴賤懸殊民間貪食鄰私勢必盡被  
侵灌自係實情惟鄂省江防經費所關至重取之食戶

所出無幾所有平江縣地方銷售鹽斤自應一律每斤捐收錢二文以昭平允候飭南督銷局遵照至義甯私鹽侵灌應由該局委員前往通城會商地方官察看情形在於義甯交界要隘實力查禁一面曉諭商民毋得越境買食致干拏究查湘岸未肯認捐江防經費本署部堂已徇督銷譚道等所請而該道等不顧江防大局於鄂省鄰界地方任令湘鹽時漲時落以期湘暢鄂滯實屬昧於公義應令平江縣地方售鹽一律加收賣價二文以昭公允儻該商仍前抗違無論商販是紳是民卽行提解來鄂以憑懲辦仰卽遵照辦理等因查平江

雖係專岸統歸湘岸辦理既奉批定每斤加價二文自應遵照一律行知惟鄂局程道所稟平岸不加有礙崇通銷路致督憲有滯鄂暢湘昧於公義之飭若僅加一文則日後崇通滯銷勢必又聯名具稟請批申飭無以饜鄂商之心而杜鄂商之口除各岸奉批加價一文另文申報外平岸應遵照督憲加價二文又查湖北章程照六百斤成引每引加五錢八分合包索滷耗稱餘每引多百餘斤其計可加長平銀七錢二分之數照錢價六錢扣算約可得錢一千二百文與督憲每斤加價二文相合見經札飭平江分局於見銷之票起每引加牌

價長平銀七錢二分所收銀兩不易錢文由卑局彙算計有若干另款存儲稟候撥用嗣據平江分局詳據聚和謙等稟稱查平江縣距湖北通城縣一百五十里南江橋係平江之北鄉距縣城七十里距通城七十五里卽距通城界亦四十五里距鄂商永泰昌所設之沙坪鹽店百三十餘里距信義生設店之崇陽二百餘里風馬牛不相及也商等自設鹽店於本岸之引地與沙坪崇陽無涉平岸東界江西義甯南界瀏陽西界湘陰西南界長沙西北界巴湘不獨北界通城也見在東西南各鄉皆有鹽店約數十處若毘連鄰境皆不許設店平

岸將無引地今信義生稟稱平江在該處切近之南江  
橋設店專售碱鹽夫南江橋與沙坪相去百三十餘里  
並非切近若謂南江橋有礙於崇通則沙坪早有礙於  
平岸矣至平江例食碱片載在鹽法志惟其鹽色不同  
是以自爲專岸若不專售碱鹽更將何售況平江專岸  
立自同治三年鄂商信義生於十餘年後援照平岸之  
例亦認運碱片明藉鹽色相符希圖浸灌平境不然鄂  
岸皆運梁鹽信義生獨認碱片乎然商等不與較也平  
岸切膚之患尤在川私緣北鄉之岑川月田板江龍洞  
羅襄南源小水嶺一帶毘連巴陵西鄉之時豐坪趙公

橋五公市藍雲浩口青沖一帶毘連湘陰西北鄉之杖  
梓岡茶山一帶毘連巴湘川私路路可入商等是以請  
裁緝私經費設卡堵私疊經稟明鹽院憲在案近因經  
費不充路經紛歧川私乘隙而入防不勝防查南江橋  
爲北鄉適中之地軍興以來共立十三團峯川肩田梓  
岡杖梓嶺等處壤地相接該市本有店鋪數十販賣碱  
鹽惟鋪面有開有收招牌有久有暫卽鹽價亦不歸畫  
一商等公同商酌因設子店於此藉以固引地而禦川  
私其地不通舟楫店中概係肩運閒用竹簍腳價甚重  
非得已也今信義生稟稱不限定售價隨時漲跌致食

戶舍貴就賤勢所必然不思平岸立有分局牌示價錢  
若任意漲價不特違示是自塞銷路也若跌價搶銷則  
同運淮南之鹽湘岸運費重於鄂岸成本有虧雖銷何  
益人雖至愚誰肯出此況由漢口至沙坪一水可達猶  
云轉運水腳皆不能少致價值貴於鄰封若平碱則由  
漢運岳由岳運平水路千餘里遠隔重湖山河又有四  
十八灘之險抵縣局後又須挑運七十里至南江橋水  
腳較沙坪數倍而猶云貴賤懸殊若非該店違例擡價  
居奇斷不至此此其說復何足信總之自川淮分銷後  
川雖暫銷五府二州實則浸灌鄂湘全岸卽如岳州之

巴陵歲銷止二三票臨湘不上一票僅平江自行緝私  
銷數較旺而遂爲同行所忌嫉不思平岸稍暢實由軍  
興以來練團守界賊未入境又鄰境避亂者多久而不  
返戶口繁則食鹽眾非從侵灌而來也崇通與蒲咸嘉  
魚各屬近接巴湘久被侵占乃鄂商信義生等任其充  
斥莫敢誰何惟歸咎於平岸之不應設店是放飯流歎  
而問無齒決也至若義甯新設倉棧有無侵灌當問江  
西與平商無涉據信義生原稟自六月初一日至十一  
日未銷片引崇陽一旬僅銷八引查南江橋子店開自  
九年二月而義甯之棧則設自本年五月旣云本年六

月該店始覺滯銷如果屬實亦祇可咎江西不能咎平岸也至每斤加價二文捐助江防經費如果湘岸三百票一律飭捐商等無不樂從惟平江亦係湖南州縣之一似未可因信義生虛誣無據之言遽生區別等情職道等查湘岸銷滯今歲所開尙係戊寅春綱丁丑綱鹽尙存不少多一粵鹽侵灌遂較鄂岸獨滯前奉鹽院批示每斤酌加一文業經遵辦稟報平江專岸尙未壓綱故奉憲台札飭每斤加價二文當由卑局轉飭遵照辦理亦經通報在案該商聚和謙等此次稟牘嘵嘵置辦無非以同屬湘岸加價兩歧譬如人家子孫析產其祖

若父念房分食指之多寡人力之強弱微存區別其子孫則不諒其用心之苦而反議其用情之偏奔告戚友投狀公庭者有之憲台胞與爲懷此次平江加價可否准照湘省各岸每斤加價一文以歸畫一伏乞示遵經署湖廣總督卞寶第批查前因鄂省鄰界平江地方鹽價時漲時落顯係該處商人意圖湘暢鄂滯阻撓江防經費是以本署部堂飭令查照鄂省之數加收賣價二文儻商販仍前抗違卽行提解究辦以示懲儆而昭公允在案茲據稟湘岸已一律加賣價一文所有平江引岸姑准照辦以歸畫一嗣後該岸若再減價爭售致礙

鄰銷或於所加一文之外影射另加價值有妨民食一  
經查出定將承辦之商提解究辦決不姑寬嗣經湖南  
督銷局札飭平江分局於見銷之票每實鹽百斤加牌  
價長平銀五分每票連餘斤約可加銀一百八十兩其  
餘斤多者亦卽全數報解由督銷局彙算計有若干另  
款存局稟候撥用

光緒十年八月戶部咨兩淮鹽政前准署湖廣總督卞寶  
第咨稱准部咨本署部堂奏鄂省江防緊要援案請加  
鹽價藉資辦理一摺查川淮兩處運楚之鹽以每斤二  
文計之每年約可收錢四十餘萬串除辦理江防需經

費銀十餘萬兩外尙有贏餘應令專款存儲報部候撥並令將光緒四年湖北辦理晉豫賑捐由淮商按引加銀一錢奏咨各案據鈔錄送部等因本署部堂查鄂省因籌辦江防奏准行銷兩湖川淮兩鹽每銷一斤加價二文業經飭令遵照抽收此項加價錢文江防辦理完竣卽應停收如有贏餘自當報部候撥至所取前辦晉豫賑捐淮商按引加銀案據一節據湖北督銷局程道桓生呈稱查從前晉省賑捐係由淮商共捐銀十萬八百兩與按引捐銀一錢之案不同其按引加銀一錢者係光緒四年豫省饑荒每鹽一引助銀一錢同時直隸

天津河間一帶饑民待賑孔殷亦照前項核收分解河  
南直隸驗收兩省所收之項諒經彙奏有案此等饑荒  
助賑並不止買販加銀一錢之款事關善舉既不仰求  
獎敘亦不呈請奏咨等情本部查捐資助賑事屬善舉  
原可無需奏報若鹽斤加價關繫課運民食豈容輕行  
議加該督前奏內稱係原照賑捐成案辦理自不難照  
案錄送何得以直隸兩省諒經彙奏有案爲詞且按引  
助銀一錢旣稱分解河南直隸驗收尤不能漫無案據  
仍令該督轉飭將前項賑捐各原案分鈔送部再查本  
年該省兩次解交山東河工共銀三萬兩據稱係動撥

湖北賑捐項下銀兩是否卽係前項賑捐見在究賸存若干共易銀若干再此項加價歲收錢若干除辦江防外盈餘若干應令該督遵照前咨迅飭局員核明報部備查毋得含混

光緒十年十一月署運司張富年等詳奉憲札開鄂省籌辦江防凡有鄂省兩省行銷之鹽川淮每斤加賣價錢二文所收錢數先由各商販交督銷及宜昌川鹽各局彙解善後局備用卽便查照體察實在情形銷數是否暢旺居民是否舍貴圖賤暗趨川粵之私務宜直陳毋隱是爲至要等因卽經孫前司飭據淮南總局詳稱諭

據鄂湘運商稟稱遵卽會議確查行鹽要策不外多銷  
銷暢則釐課可充而支應自易銷滯則多加售價而愈  
礙轉輸近來鄂湘銷市疲乏年甚一年戶口縱未能加  
增人民亦何至減少大抵舍貴貪賤人之常情私價苟  
稍減些微卽以食私爲得計況日用必需之物雖所加  
不多而於食戶之情總屬未順恐難必不趨川粵之私  
且川鹽卽一體照加而川無定價向每自爲高下非比  
淮價之畫一或故爲平價以搶售而淮更獨受其累見  
鄂岸加價業經奉行所銷卽不及前月之數並慮以後  
私販聞風沓來而官銷日滯將至按引扣繳之釐課日

形短絀所得不償所失更於全局有妨商等前已稟奉  
督鹽憲批俟兩三月後果於銷市有礙或全停或酌減  
必當剴切陳奏等因惟賴大憲體念離綱能早停一日  
之加價卽早紓一日之商艱至湘岸情形見尙未奉督  
銷局定議其所加之價雖係取之食戶似與商等無干  
然食戶與商人唇齒相依是遽增售價必致愈行愈滯  
積日久之商益深鄂湘尤均願不加爲幸等情署司等  
伏查鄂岸今年銷市上半年統計較勝去年下半年能  
否不致疲滯原未敢謂確有把握然地方鹽價之貴賤  
半由銀價之低昂目前銀價貴而錢價賤局售鹽價釐

課商本係屬銀款鋪戶以銀售進以錢售出每引實暗虧一兩之譜不能不增零售之錢則零售鹽斤昂貴亦不盡由江防之加價此項果能裁停疏銷較易第見在江防緊要又奉湖廣督憲奏准招募兩營由鹽斤加價內撥給薪糧此時似未便議請停減擬請俟數月後察看銷市暢滯再當詳請酌辦經鹽政曾國荃批此項加價固有礙於銷路惟目前江防緊要且川鹽又每斤加抽釐錢三文若將淮鹽加價請停川販更有所藉口誠如來詳未便議請停減仰俟防務稍鬆再行察看詳辦

光緒十二年三月湖廣總督裕祿奏竊查湖北省自光緒

元年七月起每年於釐金項下奉撥南北洋海防經費銀三十萬兩嗣於六年三月閒經北洋大臣奏准按八成分解每年共應解銀二十四萬兩計自奉撥以來惟光緒三年以前尙能按數解足三年七月以後卽因入絀用繁每年僅能解銀十餘萬或七八萬兩至九年後竟至無款可解見值冊設海軍奉准部議將此項撥歸海軍衙門作爲常年餉需經費之用亟應力籌有著的款源源解濟以期無誤要需惟近年鄂省釐金統計每歲所入以之分撥各項餉需收支兩抵實已不敷甚鉅揆度見時餉力若但就釐金項下設籌誠恐款無所出

難免仍多懸欠臣與司道再四熟商查湖北因籌辦江防經前署督臣卞寶第奏准將川淮兩鹽每斤加價錢二文供支防餉每年約可收銀十六七萬兩原奏聲明俟江防撤後卽行停止見值海軍興辦伊始鄂省應解要款別無可籌自不能不仍行取給於此藉資補助應請將此項鹽斤加價一款暫行展緩停收卽以所收銀兩作爲海軍經費專餉其餘不敷之數仍於釐金內籌補每年共湊足銀二十四萬兩分批報解以應要需奉旨著照所請欽此

光緒十二年三月湖南巡撫卞寶第奏准部咨議覆雲貴

總督岑毓英奏籌議改勇爲兵以固邊防一摺議由湖  
南省自光緒十二年正月起按月協解銀二萬兩從前  
積欠覓其籌解當卽飭據善後局司道詳稱滇省見辦  
設關分界需餉甚殷茲多方挪湊銀二萬兩發交雲南  
催餉委員承領解滇惟查從前月協雲南餉數四萬七  
千兩每年所解不過三四萬兩今以每月二萬兩計之  
減去之數雖逾一倍而以常年所解論之實增鉅款二  
十餘萬兩當此竭蹶之時惟有儘力籌解萬不敢藉口  
匱乏僅照常年了事至如期如數自度實有未能等情  
詳請奏咨前來臣查滇省邊防緊要部撥月餉亟應竭

力籌解與司道再四熟商竟無法籌解鉅款因思臣署湖廣總督任內辦理江防奏明於鄂湘口岸食鹽賣價每斤酌加二文湘中始未遵加後經兩江督臣曾國荃飭局籌議每斤加價一文計歲收銀三萬六千兩見時江防早撤可否將湘省所收江防經費改撥滇防五月戶部議奏查湘省所收淮鹽加價見在江防旣撤自應准其改解雲南惟湘省按月應協滇餉銀二萬兩除加價銀兩不敷甚鉅應仍由該撫設法力籌臣部前撥此項月餉原以滇省改勇爲兵藉爲計日授食之資非可刻緩當經按照該省從前月協滇餉減去一半有餘並

將歷年積欠免其報解每月僅令該省籌解銀二萬兩以期餉力得紓源源接濟見在滇省又須設防分界待餉較前尤殷該撫素著公忠自能顧全邊局所有應協滇餉不敷銀兩應請

旨飭下湖南巡撫督飭藩司無論如何爲難務當按月籌解足額不得稍有諉卸致誤要需奉

旨依議欽此

光緒十二年十一月四川總督劉秉璋奏江防海防加收川鹽釐金一案久經遵行見據富順縣楚商李大生等稟自江楚加釐後濟楚引數驟行減少且川鹽行楚認

幫淮課照納楚釐爲數極鉅利息本已甚微近復加以江海防釐商力益困行引日少惟有據情詳請奏免臣查滇黔餉需以川省爲大宗鹽局歲解滇黔軍餉至六十餘萬兩之多見該商等以鹽釐太重濟楚之引短絀若不及時停止恐貽誤滇黔餉需且江海撤防猶然加釐不止此後引滯煎停商電交困於餉款民生有礙請以光緒十三年正月爲始一律停止以紓商力而顧餉源十二月戶部議奏查川省鹽釐項下每年應解滇黔軍餉至六十餘萬之多他項協撥尙不止此較之鄂省因江防加價二文兩江因軍餉加價三文關係尤重若

此項加價不停在江楚兩省抽收無幾而川鹽成本日  
重設一旦形勢跨海則川省裁解滇黔各餉不能無慮  
況現在江海既已撤防尤宜及時停止以保正課並願  
總理惟查湖北省每年應撥解海軍衙門經費銀二十  
四萬兩前請暫緩停止江防加價以備湊解今該省既  
將川鹽加價停止商販成本自輕濟楚之引銷數應增  
則課釐亦當倍於曩昔浥彼注此諒無不敷分撥之虞  
並請

旨飭下湖廣督臣湖北撫臣務將撥歸海軍衙門經費仍於  
釐金項下按年照數籌解卽有不敷應另籌有著之款

奏解足額不得以加價停收藉詞推諉奉

旨依議欽此

光緒十三年二月湖廣總督裕祿湖北巡撫奎斌奏查鄂省所收川鹽加價一款係於光緒十年二月間前署督臣卞寶第因籌辦江防款無所出奏明將湘鄂行銷之鹽無論川淮每斤加抽釐錢二文藉資辦理嗣於十一年江防竣事卽值勘設海軍奉准部議將湖北原撥南北洋海防經費釐金銀二十四萬兩撥歸海軍衙門作為常年餉需經費之用臣裕祿當以事關自強大計亟應力籌有著的款以期無誤要需但近年鄂省釐金統



洋款未及解清之先卽奉部議令將川鹽加價停收其應解海軍經費仍於釐金項下按年照數籌解如有不敷飭卽另籌有著之款臣等伏查此項鹽釐加價本係川淮並收若停川而不停淮則川淮成本相懸淮銷不無窒礙其淮鹽加價亦勢在必停若川淮並停則鄂省所恃以湊解要餉之款卽驟少十餘萬兩揆度目前餉力實屬萬難周轉雖鄂省應還洋款本年祇贖一期較之上年可節出銀十萬餘兩而見在奉部文令將本年節出之款卽按十三年應還洋款數目照解部庫以補加放俸餉不敷之數京餉要需尤不敢不儘力籌解通

盤核算是曩日所計之出款仍難核減所指之解款仍歸無著所謂加價停止後濟楚之引銷數應增課釐當倍曩昔不過懸揣之詞實則一無把握本省入款止有此數海軍經費待用孔殷設致收數不濟挪借無從卽所謂另籌有著之款者亦恐空言無補臣等詳加籌計並與司道再四熟商惟有仰懇

天恩俯准將停收川鹽加價限期暫爲展緩數月仍與淮釐照常加收統按本年應還一期洋款之數限以收至十萬餘兩爲止俾第十二期應還洋款及本年應解海軍要餉均可湊解無誤一俟前數收足卽由臣等將川淮

兩項鹽釐加價一律奏明停止亦免辦理偏畸以後自十四年起無須再還洋款鄂省釐金項下每年即可騰出銀二十萬餘兩除見奉指撥補解加放俸餉不敷銀十萬餘兩仍當遵解部庫外其餘之十萬餘兩卽請以之抵解海軍經費庶此後釐金力足勻顧湊解不致短絀似此量爲變通在川淮各商素明大義自開辦加釐以來業已遵行數年茲不過暫展數月商力所捐無多似不致爭此尾餘之期限而鄂省得此補助藉資周轉要款可期有著實於餉力裨益匪淺奉

旨著照所請欽此

光緒十三年八月兼署湖廣總督奎斌奏前於光緒十年  
二月間前署督臣卞寶第因籌辦江防需款繁鉅奏明  
將湘鄂行銷之鹽無論川淮每斤加價錢三文供支防  
餉嗣防務告竣卽值勘設海軍奉准部議將湖北原撥  
南北洋海防經費銀二十四萬兩撥歸海軍衙門作爲  
常年餉需經費之用經本任督臣裕祿以此項要餉如  
僅就釐金項下設籌難免仍多懸欠奉准將川淮鹽斤  
加價一款暫緩停收卽以所收銀兩作爲海軍衙門專  
餉其餘不敷之數仍於釐金籌補本年正月間接准部  
咨議覆四川督臣劉秉璋奏行令將江楚兩省加收川

鹽釐錢卽以光緒十三年爲始一律停收又經裕祿與臣當查此鹽釐加價本係川淮並收若遽行停止則鄂省所恃以湊解要餉之款卽驟少十餘萬兩揆度餉力萬難周轉請將停收限期暫爲展緩數月俾本年第十二期應還洋款卽應解海軍要餉均可湊解無誤奏奉諭旨允准在案見查鄂省應還洋款業已籌解清楚自應查照前議辦理惟彼時僅請展緩數月者原因自光緒十四年起湖北無須再還洋款釐金項下卽可騰出餉力撥解海軍經費見准戶部咨恭辦

大婚典禮豫撥款項案內提撥湖北本年由西征洋款改爲

加放俸餉銀十萬兩京官津貼改爲加放俸餉銀一萬六千兩十四年騰出還清西征洋款銀二十萬兩事關典禮要需謹當遵照籌備但騰出洋款旣奉提撥則海軍經費每年仍短少銀十餘萬兩此餉爲目前自強切要之圖必須籌一有著的款庶不致有誤報解臣督飭司道通盤籌畫舍前項加釐別無挹注之方再四思維惟有仰懇

天恩俯准將川鹽加價錢文仍與淮釐照舊抽收藉資海軍

大婚款項以期兩無貽誤至此項加抽鹽釐錢文名雖取之

商販實則攤諸食戶分計爲數甚微合之便成鉅款在  
鄂餉有轉輸之益於民間無苛擾之虞川淮各商素明  
大義歷年循環運繳相安無異深於餉項大局有裨查  
自奏請加抽以來綜計銷鹽數目淮鹽無甚盈絀川鹽  
惟上年頗形短絀其餘比較光緒八九兩年未經加價  
之日均屬有益本年展限之後宜昌川鹽局抽收鹽課  
亦甚暢旺可見於銷路毫無窒礙該商等必不致有藉  
口一俟鄂省餉力稍紓卽當隨時體察情形奏明停止  
以昭大信奉

旨著照所請欽此

兩淮鹽法志卷一百二十五

兩淮鹽法志卷一百二十六

鄰稅門

湖北應鹽稅課

應城膏鹽其產絕微自淮運道梗尙產忽盛亦猶四川鹽井交夏則水淡停煎至軍興而夏水仍鹹蓋地不愛寶其理固然也應鹽銷數每年合淮鹽萬引以舊額計之僅占鄂岸五十分之一然川鹽未停北潞交灌再有應鹽侵占腹地淮界益感若不爲限制則涓涓細流且爲江河疆帥苦心調停乃盡三縣以固之減熬竈重稅課束應以益淮亦惜民保課之善計矣志應鹽稅課

同治四年四月湖廣總督官文附奏再湖北應城縣地方  
向有石膏廢崗年久膏盡出液成滷可以煎鹽歷係禁  
止偷取恐礙官鹽銷路軍興以來長江梗阻淮運不通  
民間有淡食之虞經奴才與前撫臣胡林翼委員查悉  
情形爲一時權宜之計暫行弛禁仍令照潞鹽完釐以  
充軍餉每月所收釐錢附入票潞鹽課項下兩月一次  
奏報在案數年以來辦理並無成效蓋緣膏液煎鹽所  
出無多兼之鹽味苦澀遠處不能銷售僅止附近居民  
貪其價賤間有買食見在江路已通自應照前封禁惟  
查淮鹽尙未暢銷而該處窮民頻年兵燹藉此煎鹽附

近售賣暫救飢寒若遽行禁止立見流離失所實堪矜憫據湖北布政司厲雲官鹽法武昌道盛康體察民情再四籌議請俟淮鹽暢行楚省軍務大定再行議禁等情詳請具奏前來奴才伏查淮鹽見尙未能暢銷小民烽火餘生藉此煎鹽暫圖生活似應量加體恤該司道等所詳洵係實在情形且票潞川鹽均在應禁之例特以淮綱未復餉需支絀仍暫提課以充軍餉今應城尙鹽旣已完釐雖爲數無幾而事同一律此鹽僅在附近銷售與見行淮鹽並不關礙一俟淮鹽暢達民困稍蘇再行議禁奉

戶部知道欽此

光緒十年六月

欽差工部左侍郎孫毓汶等奏竊臣等接奉

寄諭有人奏湖北應城縣徵收鹽斤石膏稅課自德安府同知蔡懋廩接辦以來百弊叢生多立名目恣意朘削等語著孫毓汶等將所參各節徹底詳查如果屬實卽行從嚴參辦並將該處徵收稅課明定章程剔除弊混等因欽此臣等遵卽札飭布政司蒯德標鹽法道武震會委委員馳往應城將該稅局官私底帳並該同知所派經手丁書人役提解來省以憑查訊仍按照所參各款嚴密訪

查據實回稟去後旋據該司道將蔡懋賡撤任來省聽候查辦會委候補知縣洪錫爵提同人卷來轅並將查訪情形縷晰稟覆臣等當將解到人卷發交該司道飭委武昌府知府王庭楨督同局員嚴加查訊茲覆據該司道將核算局帳提訊丁役各情會稟前來臣等詳加覆核應城石膏井鹽稅課向分兩宗石膏有稅有釐另派委員駐局徵收現係候補通判李慧鐘專辦尙無弊混其井鹽一宗又分陸課水課陸課卽原奏所稱陸釐現係委員候補知縣李穎名承辦惟水課一宗每年額徵制錢二萬餘串專歸同知蔡懋賡經理水課謂之紅

課係查水之鹹淡以定課之多寡水課之外又有土課  
鍋金課三七減課謂之黑課皆係歸公款項向章如此  
辦理尙非該同知創立名目自飽私橐惟出水之鹹淡  
多寡非惟各崗不能一律卽一崗亦不能始終一律加  
減無定總以查報爲憑此外三七減課等名目尤爲繁  
瑣雖廉幹之吏稽查防範亦萬難周密此實因立法之  
未善亟須改定新章剔除積弊者也據委員洪錫爵稟  
稱該同知接辦以來徵收尙無短絀原參貪鄙苛刻恣  
意朘削及業戶復鑿餽送多金等款查無實據其行臺  
小課一款係光緒五年捐修膏鹽公所七年工竣捐費

卽止並無小課之名惟訪聞派查鍋金熬戶之丁役有  
飯食夫馬等費商民均以爲言該同知不及覺查等語  
現經該司道提訊丁書人等據供鍋金每五日查一次  
給馬夫飯食一二百文熬戶每十日查一次給司事轎  
錢一二百文僅六七紅崗有之係向來私費該同知並  
不得知此外實無別項零費並增立名目情事又據府  
局委員核算膏鹽公所工程賬簿總數短錢四十二串  
有零係首事勾稽錯誤飭令該同知先代賠繳此外亦  
無情弊各等語臣等伏查同知蔡懋廣自光緒元年補  
授斯缺歷任不爲不久雖課額並無虧短亦查無貪苛

劣蹟而於舊章之繁瑣不思及早籌議變通丁役之私費又未能查明禁革以致商情不協嘖有繁言應請

旨交部議處其私受小費之丁役人等仍交武昌府訊明按例詳辦至此項井鹽水課釐定新章必須歸於簡淨原奏以出鹽斤重爲納課準則實爲扼要之論惟出鹽之紅課止有六七崗而蓄水之黑課多至六七十崗向以黑課之有餘補紅課之不足又須另立畫一之法嗣後開火熬鹽卽按鹽收課每鹽一斤抽收課錢四文蓄水封崗卽按崗納課每崗一座計日完納課錢四百文所有從前一切瑣碎名目稽查浮費盡行汰除仍將水課

歸併陸課一局經收以便稽核而節糜費謹將議定各條另繕清單恭呈

御覽候

旨遵行 一紅課宜改抽鹽斤也查開爐熬鹽謂之紅課向由委員嘗水之鹹淡定課之多寡難免意爲輕重擬請以鹽定課每鹽一斤抽熬戶錢四文按日計斤完納試辦一年察看情形再定增減作爲定章剴切曉諭商民一體遵辦其從前稽查鍋金等項一切浮費名目概行革除以杜擾累 一黑課宜一律定價也查封崗蓄水謂之黑課緣崗水淘盡勢必封蓄待其復鹹然後開熬

向來本有三七減課名目有自十數千起十日一減遞減至三四百文爲止者井商資本有限逐層耗折弊累之重莫斯爲甚又鑿膏之後領蓄者爲新領封禁之後另招者爲復領完日課一二百文者皆謂之黑課此等黑課必先報明認領方爲本業否則任人承辦轉啟爭端然等次太多旣屬繁瑣且水之鹹淡無定時爲循環擬請嗣後領認黑課之戶無論尙之優劣水之鹹淡酌中均定爲四百文不增不減以昭簡便如水淡無利不願認課准令他戶承領本戶不得把持俟開熬之日卽行停止黑課仍照出鹽斤數歸於紅課抽收以昭畫一

一土課宜紅黑分抽也查尙水太淡必須撥土向有  
土課名目經此次定章以後撥土之時並未開熬卽歸  
黑課出鹽之時已經開火卽歸紅課以示區別 一鑿  
膏宜照章准鑿也查汲涸封禁之尙必須鑿膏而後可  
以汲鹽從前章程太苛商民視爲畏途以致愈絞愈淡  
尙多廢棄此次定章以後凡請鑿膏者卽照封蓄之尙  
每日祇完黑課四百文照章查明離鄰尙三百六十步  
以外卽准復鑿應令尙戶報明膏稅局知照鹽局俾杜  
影射仍無庸將熬棚鑪隻拆盡亦不得需索絲毫費用  
以廣鹽源如尙有餘水可以熬鹽仍以開火之日歸於

紅課辦理息火之日仍完黑課以歸一律 一課釐宜  
歸併兼收也查井鹽水課抽之熬戶陸釐仍責成熬戶  
抽之行商雖名目不同而辦理則一擬請將水陸兩局  
歸併一局合辦歸併之後陸局照常駐城經管課錢冊  
報再添一會辦委員擇於各崗適中處所駐劄專司稽  
查報驗 一經費宜酌量裁減也水陸兩局旣經歸併  
所有局中書差司事人等均可酌裁以省費用除陸課  
局章應仍其舊外至水課向提二成留作局用見擬酌  
減爲一成半開支專辦會辦委員各半分銷按月造冊  
彙報再查應城鹽崗據本年二月冊報見尙存六十八

崗計開崗紅課係七處封崗黑課係六十一處以陸課  
每鹽一斤抽錢二文計每年收錢七千串內外水課加  
倍抽收應每年收錢一萬四千串內外再以黑課每崗  
每日抽錢四百文約以六十崗計之每月計收錢七百  
二十串文每年應收錢八千六百四十串文綜計每年  
共應收課錢二萬二千餘串較之歷年課額不甚懸殊  
似此明定章程開火熬鹽卽歸紅課熄火蓄水卽歸黑  
課從前一切煩碎名目稽查浮費盡行汰除於向來收  
課分數亦尙相符應請試辦一年查看課餉是否無虧  
商民是否稱便再由督撫奏定永遠遵行奉

上諭著照所議辦理該部知道欽此

光緒十一年四月湖北鹽法道詳案照應城井鹽經督銷  
淮鹽局稟以既經收稅原不限其銷路第產自楚疆行  
銷鄂界江防經費似須一律照加鋪販坐釐應否按斤  
收繳當奉署督憲卞批准照辦卽經轉飭應城井鹽局  
遵照旋據該局委員李穎名等稟據各局商乞恩免加  
職道當以川淮各鹽均已加抽而應鹽獨免何以昭情  
理之平批令傳集各局商反覆開導見據該委員稟稱  
據局商陶永隆等呈稱淮鹽課釐約計每斤徵收錢二  
十餘文川鹽釐額每斤徵收錢一十八文應鹽水課陸

釐向共徵收錢六文原定課釐無多祇以應鹽質色較  
次銷路不廣並且資本花費過重實難與川淮比較懇  
從輕加捐防費俟江防告竣仍請停止等情查卑局徵  
收水課較水熬鹽每竈每天出鹽三百餘斤至四百五  
十斤不等今酌中定數每竈每天除正課外加收江防  
經費錢四百文擬從四月初一起跟隨正課加收防費  
按月另文申解厥後列入正課尾總後另款隨冊造報  
所有解課水腳上下挑錢力以及串索各項局用經費  
應否查照水課章程扣留一成五分之數均候示遵再  
應鹽陸課原係挑販所出販戶稱之曰鹽釐惟念各販

戶悉係貧苦小民不忍再議加釐邀免加增等情前來  
職道擬照該令等所擬江防經費從四月初一日起每  
甯每天抽錢四百文挑販不再加抽以示體恤經湖廣  
總督裕祿批如詳辦理仰卽轉飭遵照並移會督銷局  
知照至所收錢文應於抽收應鹽課稅案內彙詳奏報  
見在毋庸專案奏咨

光緒十一年六月湖北督銷局張銘堅呈奉憲批應城井  
鹽雖由該道稟請照收江防經費鋪販坐釐而較之淮  
鹽價值貴賤仍屬參差見擬運至各處者一體收釐係  
爲持平起見候咨明湖廣督部堂酌核辦理惟此乃目

前補苴之計究竟應城每年所出井鹽若干應如何定以限制之處俾免日盛一日應由該道查明妥議具復等因旋據井鹽局覆稟議加江防經費並給發應鹽護照各等情到局卑局當查應鹽產數原未深知閒就往年收稅數目科算合之准鹽或不及萬引惟加收一節一再稟議始加此數目前自未便再申前說至井鹽行銷地界照鹽道來文係行黃陂孝感雲夢漢川天門京山安陸應山隨州九州縣則武漢黃德四府界內所指七州縣遇有應城井鹽查驗鹽照相符未逾十日之期惟有暫准放行如已逾限期或以他項私鹽藉行影射

自仍不准放行其餘未指各州縣卽有護照均應一體查緝前經咨商鹽道衙門查照在案似於無可設法之中仍寓微有限制之意第近來鹽井煎熬得法色味漸嘉恐產銷益形暢旺侵灌愈甚除咨詢鹽道衙門此項井鹽有無額限咨復備查外理合具文呈報

光緒十一年八月署運司程桓生詳竊據鄂岸運商盧大昌等稟稱淮南銷鹽引地向以楚北爲最要稍有占礙立形壅滯查湖北應城縣本屬淮鹽引地向有石膏廢崗出液成滷歷來禁止不准偷取煎鹽恐礙淮銷防微杜漸意美法良迨粵逆竄擾淮運不通其禁暫弛同治

四年經前湖廣閣督部堂官奏明應城鹽膏見在江路已通自應照前封禁惟准鹽尙未暢行該處居民藉此煎鹽暫救飢寒請俟准鹽暢行時再議封禁等因然亦祇准附近崗地居民買食從無越境侵銷之患本年四月忽經井鹽局委員稟奉湖北鹽道印發行鹽護照分給崗販持領運鹽行銷黃陂孝感天門漢川安陸雲夢隨州京山應山九州縣屬地方移知鄂岸督銷局轉飭緝私卡員各縣文武驗照放行商販等特有護照毫無顧忌開拓愈廣招徠愈多藉膏鹽爲名專透北私潞私賤價灑賣見在黃孝等九縣盡被侵占准鹽銷數頓疲

查湖北引地上游荆宜鄖襄等五府一州已被川鹽久  
占僅餘武漢黃德四府引地已蹙再任應城膏鹽透私  
夾攻淮鹽釐課最重加以長江運腳經費成本獨昂豈  
能與敵若不及早挽回不獨

國課商本隱受其害而淮鹽億萬竈丁鹽無去路生計頓  
絕其害不可勝言商等爲保全引地起見稟乞詳咨將  
應城峒滙一律封禁不准煎鹽轉飭湖北鹽道撤銷護  
照以杜影射並懇奏明定案又據通泰場商聚和公等  
稟稱近年岸銷疲滯商情惶惑又於五月間聞應城井  
鹽產數甚旺占銷黃陂孝感漢川天門京山安陸雲夢

隨州應山九州縣地方漢岸來信並鈔鹽道札文一道  
接閱之餘實深駭異伏查湖北九府一州均屬淮鹽引  
地川鹽侵銷已成積重難返之勢況武漢黃德四府界  
內北有潞私票私南有岱私引地日見其蹙釐課日見  
其減其始也每年尙可銷十二萬引近年不足十萬引  
銷數更形疲滯查應城井鹽其初不過肩挑小販藉以  
謀生見已立有井商名目且由委員給發執照挑販恃  
爲護符私販窩國流弊不可窮詰多銷一引之井鹽卽  
兩淮短徵一引之釐課楚岸爲二百年來淮商固有之  
引地川界旣不能收復應鹽又肆意侵銷淮南廢棄可

立而待況應城井鹽久干例禁載明志書商等承辦垣  
務全賴岸銷暢旺藉以轉輸見儀棧存鹽至三十餘萬  
引之多鹽無銷路則課無來源二十場竈戶煎丁生機  
殆絕此尤商等之隱憂而不敢明言者也伏乞轉詳督  
鹽憲咨商楚督憲將應城井鹽勒限封禁各等情署司  
伏查鹽志內載雍正四年奉部議覆巴東井鹽行於巴  
東等縣轉恐川鹽借此混入於楚則淮鹽必致壅滯於  
國課無益應令嚴加封禁毋許奸民私行煎販儻有偷漏  
失察按照律例治罪處分又查同治四年奉前湖廣督  
憲官奏明應城尚鹽因淮運不通是以從權暫行弛禁

一俟淮鹽暢行再行議禁等因是楚省本地井鹽本係  
例所應禁應城尙鹽當初偶然弛禁而淮南商前無異議  
者良以止售附近一隅之地佔銷尙少迨淮鹽暢行既  
久尙商早應禁止今反明定章程給照推廣使私販公  
行無所顧懼且視北私潞私路近價廉小民貪賤食私  
更必蔓延爲患佔礙淮銷伊於胡底議者謂尙鹽奉准  
行銷一旦封禁尙戶生機殆絕不知淮南二十場商竈  
人等不下數百萬戶應城尙戶本以石膏爲生計非無  
業可圖視淮南商竈非鹽不生者情形迥異又謂旣准  
給照抽釐一經禁阻鄂省不免窒礙不知淮鹽本有鄂

釐淮銷果暢鄂餉卽因之而增兼權兼顧殊於鄂省兩  
無出入況黃孝等九州縣本屬淮南引地現在淮鹽存  
場存棧積滯一百三十餘萬引存岸之鹽尙不在內商  
本愈積課釐愈絀餉源攸關實非淺鮮旣據場運各商  
聯名公稟理合轉詳仰祈奏咨辦理一律封禁以遵成  
法而順商情經鹽政曾國荃批查楚省井鹽例應封禁  
載在鹽志應城向產膏鹽前因煎熬未甚得法出鹽較  
少侵淮無多本年三月間經鄂局稟明自十年奏請改  
歸委員專辦該局雇匠指示出鹽漸多色味與淮鹽相  
等價值較淮鹽減半小民貪圖便宜多食膏鹽淮鹽日

形阻滯稟請照收江防經費鋪販坐釐以致提價阻銷  
旋准湖廣督部堂咨飭據北鹽道議詳祇收江防經費  
從四月初一日起每竈每天抽錢四百文挑販不再加  
釐以示體卹等因維時中法和議尙未大定不能不暫  
時通融詎知井商得步進步因收江防經費逐漸推廣  
竟請護照行銷黃陂孝感漢川天門京山安陸雲夢隨  
州應山等九州縣八月初十日又據鄂局呈報該販等  
爲成法所拘轉覺不便稟請將照註銷在案是不用護  
照該販等不限於垣不限於日更覺隨處可以灑賣井  
鹽價賤路近較川鹽侵淮害更不可窮詰現在海氛已

靖不特應鹽所收江防經費自應停止卽該崗戶等向以石膏爲生亦應仍圖本業且鄂省應收淮釐爲數不少諒不致迴護應禁之井致貪小而失大仰候咨請湖廣督部堂會銜具奏仰飭北鹽道將應城井鹽循例封禁以保淮鄂兩省餉源並將十年奏請改歸委員專辦原案錄送備查並行督銷局知照

謹按湖北鹽道所給應鹽護照業據井首等稟請註銷

光緒十一年十月署湖廣總督裕祿咨據湖北布政使蒯德標署鹽法武昌道瞿廷韶會詳以應城膏崗之鹽行

銷已幾及三十年小民視爲地方固有之利相安已久  
此時若遽封禁謂該商有本業可圖則鹽可禁而膏不  
能禁鹽卽膏之餘水膏成而鹽卽隨之一氣相生正不  
能歧而爲二況窮民之藉以傭趁者數逾巨萬一旦頓  
絕生機誰甘坐斃勢必相率偷熬從此無課之鹽成本  
愈輕售價愈賤到處侵銷莫可窮詰在鄂省每年少收  
此數萬串之課爲數極微而淮岸又增一崗私名目爲  
害較甚伏思

國計與民生並重與其封禁而盡變爲私不如重其課稅  
限以煎熬日漸月摩使之無利可圖相率改業勢輕易

舉若遽設厲禁操之過切則非徒無益而又害之正不能不鰓鰓過慮也應請咨商暫緩封禁等情前來本署部堂查應鹽出於膏尙情形與井鹽不同居民開鑿膏膏盡積水即可煎鹽水盡則又鑿膏膏出鹽隨本屬一氣相生鑿膏取鹽並非兩業禁熬鹽而不能併禁採膏其尙勢難查封尙旣難封膏液自在自然之利誰肯棄置雖設以厲禁而小民趨利若鶩私煎之弊斷難盡絕該司道所詳恐禁後而盡變爲私從此無課之鹽成本愈輕售價愈賤到處侵銷莫可窮詰而淮岸又增一尙私名目爲害較甚各節自屬實在情形况應鹽咸豐

初年弛禁以來尙民業此者已年深人眾驟禁勢有難  
行即使令其各圖石膏本業亦必逐漸收束辦理方無  
窒礙詳加酌核應請如該司道所議從緩封禁仍先重  
其課稅限以煎熬隨時察看情形次第妥爲籌辦以期  
商引民情兩資兼顧不致別生弊端批飭再將如何限  
定崗數及售界日期數目逐細妥籌酌議詳辦以備稽  
考而杜濫竽應俟該司道詳覆到日再行咨明辦理外  
准咨前因合先鈔錄上年膏鹽原案備文咨覆旋經鹽  
政曾國荃覆咨查應城井鹽本在應行封禁之例前准  
收釐在近地行售係屬暫時權宜承辦委員須知有益

於鄂無害於淮方能持久乃竟講求煎熬逐漸推廣於黃陂孝感九州縣到處充斥非特有害淮銷並且有害鄂餉以致淮商紛紛呈控本爵部堂不能不上顧

國課下順商情咨請會銜奏禁今准來咨以限定崗數售界日期數目嚴杜灑賣期逐漸收束果能立有限制不致泛濫於淮鄂兩無妨礙暫緩申禁亦無不可熟商請煩轉飭妥議實事求是俾淮商咸曉然於應城井鹽以後有減無增自可彼此相安幸勿徒有限制之名仍作擴充之計統俟該司道等議詳咨到應否具奏再行酌核辦理

光緒十二年十月署湖廣總督裕祿奏應城縣膏崗所出  
鹽斤前經明定章程聲明試辦一年查看課餉是否無  
虧商民是否稱便再由督撫奏定永遠遵行計自光緒  
十年八月試辦起至十一年七月止一年期滿商民稱  
便課餉無虧即可作爲定章適准兩江督臣曾國荃咨  
商封禁臣以該處膏崗所產之鹽自咸豐初年前督臣  
官文奏明弛禁煎熬以來行銷幾及三十年小民視爲  
地方固有之利藉以謀生者甚眾且鹽係膏之餘水煎  
成膏出鹽隨本屬一氣相生禁熬鹽而不能並禁採膏  
勢必相率偷煎變而爲私到處侵銷莫可窮詰惟有從

緩封禁限以煎熬鑪數及行銷界限庶幾商引民情兩資兼顧當經飭據司道委員查覆應城熬鹽之鑪定章每鑪一座設鍋九口熬一日一夜爲一鑪每鑪約計出鹽三百五十斤有報請開火者由委員按鑪徵課鑪數向無定額嗣後應以新章試辦一年期內所報開熬一萬六千七百餘鑪作爲舊額統計核減三成每年准熬一萬一千餘鑪不許私自加增庶出鹽之數較減於前以顧淮銷至應鹽自昔年開辦以來向在應城及附民之安陸應山雲夢黃陂孝感漢川隨州天門京山等州縣銷售除天門京山行銷川鹽外其餘均係淮鹽境地

曾國荃以應鹽銷路太廣不可漫無限制往返咨商必  
須畫清地界議准於應城本邑及向銷川鹽之天門京  
山二縣照舊行銷其分淮界內之應山等六州縣不准  
再有應鹽侵入並由淮鹽局在於各州縣衝要地方設  
立巡卡分撥礮船派員堵緝查應鹽出自石膏餘液味  
苦質嫩民間有力之家本不多於購食向惟附近漢孝  
雲夢一帶濱湖貧戶因其嗜性獨重醃魚爲宜藉爲生  
計需用較多見因淮南恐礙引鹽銷地旣經兩江督臣  
咨商核辦淮鹽本爲經制大宗自不能不束應益淮以  
期顧全正課但經此次收束以後鑪數旣不如向日之

多銷路又不及從前之廣將來銷售能否疏通課稅能  
否無絀均難懸定似尙未便遽作定章應請再行試辦  
年餘如果行無窒礙課收數目不致相懸卽行奏明作  
爲定章再前因籌辦江防奏明將淮川二鹽酌加價值  
抽收錢文應鹽一體加抽見在此項江防經費業經奏  
准改爲海防專餉應城鹽斤亦照案辦理理合併陳奉  
旨戶部知道欽此

謹按光緒十四年四月湖廣總督裕祿奏應鹽自減  
鑪限界後銷數疲滯課額尙難遽定經戶部議暫照  
十三年收數比較

又按先於同治十一年湖廣總督李瀚章奏裁川鹽  
陸課案內附陳應城縣并課核計每月收數無多應  
請改爲年底彙報一次以歸簡易

兩淮鹽法志卷一百二十六